




## *Minjinaweziwin - e - inindwaa Gete-gikino'amawaaganag Gaa-gii-izhaawaad Gikino'amaadiiwigamigong*

 ii-maanzhidoodawaawag abinoojiyag gii-izhinizha'ondwaa getegikino'amaadiiwigamigong odaanaang.

Awashime ningodwaak daso-biboon owe minik 150,000 abinoojiyag gii-odaapinaawag endaawaad onji gikino'amaadiiwigamigong e-gii-izhinizha'ondwaa. Ningojigo 1887 gii-izhiseg, Kaanada-ogimaa o-gii-maajitoonaawaa ji-gikino'amawindwaa anishinaabensag, amii dash gaa-gii-onji-maajii-ozhitoowaad ini gikino'amaadiiwigamigong. Niizhwayag gii-inwaadewan ini gikino'amaadiiwigamigong. Bezhig: ji-odaapinindwaa abinoojiyag odaawiniwaang gaa-izhi-gikendamowaad odizhigiizhwewiniwaa, odizhitwaawiniwaa, eyaanid odinawemaaganiwaa', gaye dash owe: Ji-izhi'indwaa ji-zhaaganaashiiwaadiziwaad, ji-wanitoowaad odanishinaabewaadiziwiniwaa'. Dabasendaagwan anishinaabewaadiziwin gii-inendam gichi-ogimaa. Ji-nichigaadeg iwe anishinaabewaadiziwin o-gii-izhi-aandawendaan gichi-ogimaa. Noongom dash ni-nisidawinaamin e-gii-onizhishinziinog iwe inendamowin, e-gii-maanzhidoojigemagak gaawiin gaye ji-gii-izhisegiban omaa gidakiiminaaning.

Ningodwaak nisimidana-shi-niizh gikino'amaadiiwigamigong gii-ayaawan endaso-akiinsing omaa Kaanada-akiing. Gaawiin eta Newfoundland, New Brunswick, Prince Edward Island. Gii-izhi-wiiji'aawag igi anama'ewigamigong Zhaaganaashiiwi-anama'aawin, Wemitigoozhii-anama'aawin, gaye Presbyterian gaye United Church anama'aawinan. Kaanada-gimaa dash gii-izhichige e-gii-odaapinindwaa Anishinaabensag, ngoding aapiji waasa e-gii-asindwaa ji-gikino'amawindwaa. Niibiwa igi gaawiin gii-de-ashamaasiwag, gaye gaawiin gii-de-ayaasinoong

ge-gigishkamowaad, gaye ge-izhidaawaad. Gaawiin o-gii-ayaasiinaawaa ji-dazhi-ombigindwaa endaawaad, oniiigi'igowaa' ji-ombigi'igowaad. Gii-wanise iwe. Anishinaabemowin, gaye Eshkiimemowin gaye gaa-izhigiizhwewaad Aabitawizhaanag gaawiin gii-bagidinaasiwag ji-izhigiizhwewaad gaye ji-biminizha'amowaad odizhitwaawiniwaa. Aanind ogo abinoojiyag gii-ishkwaa-bimaadiziwag megwaa gikino'amaadiiwigamigong gii-ayaawaad gemaa gii-gagwe-giimiiwaad e-wii-giiewewaad.

Onizidawinaan dash noongom Gichi-ogimaa e-gii-nishi'onaajichigemagak iwe gikino'amaadii-ikaakonigewin, geyaabi e-maanzhidoodaagowaad gete-gikino'amawaaganag e-gii-wanitoowaad odizhitwaawiniwaa gaye odizhigiizhwewiniwaa. Aaninda o-mino-dazhindaanaawaa gaa-gii-izhi-gikendamowaad, nawach dash baatiinowag igi gaa-gii-maanzhidoodawindwaa, gii-gagwaadagi'indwaa, noojigo gii-doodawindwaa gaye gaawiin nawaach gwayak e-gii-izhi-naagaji'aasiwindwaa, gii-onji-odaapinindwaa odaawiniwaang gaye gaa-onjiwaad.

Noongom gikendaagwan gaa-gii-izhichigemagakin ini gete-gikino'amaadiiwigamigong gii-waabanjigaadeg gaa-izhi-maanzhi-bimaadiziwaad noongom anishinaabeg dazhiikewining.

Aapiji zhiibendamoo igi gaa-gii-zhaabwiiwaad gikino'amawaaganag e-giigidowaad noongom e-dazhindamowaad gaa-gii-doodawindwaa. Amii epiichi-zoongaadiziwaad gaye epiichi-zoonganinog odizhitwaawiniwaa. Geyaabi dash, gaawiin niibiwa omaa ayaasiwag gete-gikino'amawaaganag, ozaam e-gii-ishkwaa-bimaadiziwaad jibwaa-noondamowaad owe gaa-wii-ikidod noongom gichi-ogimaa Kaanada akiing onji.

Kaanada akii gichi-ogimaa onisidawinaan giishpin minjinaweziwin-ikidowin ikidosig, gaawiin da-gashkichigaadesinoon ji-noojimong. Amii dash wenji-ikidod noongom gaa-onji-niibawiyaaan omaa gakina Kaanada akiing awiyag e-ganootamawagwaa, e-ikidoyaan e-minjinaweziyaan gaa-gii-doodawindwaa Anishinaabeg omaa gikino'amaadiiwigamigong Kaanada aki dash e-gii-doodang.

Ngojigo 80,000 gaa-dashiwaad gete-gikino'amawaaganag gaye odinawemaaganiwaa' gaye ini dazhiikewinan gaa-onjiwaad, amii Kaanada-aki e-nisidawinang e-gii-maanzhi-doojigemagak gii-odaapinaawaad abinoojiyag' endaawaad onji, ni-minjinawezimin dash e-gii-doodamaang owe. Noongom ni-nisidawinaamin gaawiin e-gii-onizhishinziinog ji-onji-odaapinindwaa Anishinaabensag imaa odazhiikewiniwaang gaa-gii-izhi-onizhishinziinog Anishinaabe izhitwaawin, ni-minjinawezimin dash iwe e-gii-doodamaang. Ni-nisidawinaamin noongom e-gii-odaapinangidwaa abinoojiyag odaawiniwaang onji, amii noongom gaawiin ogashkitoosiinaawaa Anishinaabeg ji-ombigi'aawasowaad gaawiin aaniish wiinawaa o-gii-gikendanziinaawaa ji-ombigi'indwaa gwayak, gikino'amaadiiwigamigong eta e-gii-gikendamowaad bimaadiziwin, amii dash giyaabi owe gaa-waabanjigaadeg e-izhiseg, amii dash ezhi-minjinaweziyaang owe e-gii-doodamaang. Ni-nisidawinaamin ozaam moozhag, e-gii-ayaamagak gagwaadagi'iwewin imaa gikino'amaadiiwigamigong, gaawiin gaye gwayak e-gii-naagaji'aasiwindwaa abinoojiyag, ni-minjinawezimin dash e-gii-gashkitoosiwaang ji-naagaji'igooyeg gii-agaashiiwiyeg gikino'amaadiiwigamigong. Gii-agaashiiwiyeg owe gi-gii-gagwaadagi'igoom, noongom dash

e-gichi-ayaawiyeg, gaawiin gi-gashkitoosiim ji-gibitinigaadeg iwe naasaab dinookaan gagwaadagi'iwewin gaa-gikendamowaad noongom giniijaanisiwaag, amii dash wenji-minjinaweziyaang.

Ozaam ginwesh gi-bimiwidoom owe maanzhi-doodaagoowin. Niinawind gii-ogimaawiyang nin-daa-bimiwidoomin iwe maanzhi-doodaagoowin. Gaawiin wiikaa miinawaa iwe daa-inenjigaadesinoon ji-gojichigaadeg gaa-gii-izhi-gojichigaadeg gii-ozhichigaadegin ini gete-gikino'amaadiiwigamigong. Noongom gi-bi-noojimom, e-gagwe-nagadameg iwe gaa-gii-izhi-gichi-gagwaadagi'igooyeg gikino'amaadiiwigamigong, gi-wiijiwigoom dash noongom. Kaanada aki ogimaawin ikido e-minjinawezid gaa-gii-izhichigeng odaanaang gaye dash gi-gagwejimigoom dash ji-bagidendameg gii-maanzhidoodaagooyeg.

Amii dash e-maajichigaadeg iwe noojimowin gaye mino-inendamowin gaye ji-bagidinigaadeg iwe gaa-gii-izhichigemagakin gikino'amaadiiwigamigong, gii-maajichigaade iwe IRSSA manoominigiizis gii-bimangizod 17, 2007 gii-izhiseg. Amii dash odinendamowiniwaa igi gete-gikino'amawaaganag gaye dazhiikewinan gaye Anishinaabe izhichigewinan gaa-ozhitoowaad iwe mazina'igan e-onji-maajitaang maamaw ji-niigaaniiyang.

Owe dash da-onji-ozhichigaade imaa Settlement Agreement iwe Debwewin gaye Mino-inendamowin Izhichigewin. Amii maa Izhichigewining ge-ondinigaadeg ge-onji-gikino'amawindwaa gakina awiyag omaa Kaanada akiing gaa-ayaawaad gaa-gii-izhiseg imaa gete-gikino'amaadiiwigamigong. Amii ge-izhi-maajitaang ji-wiijiwidiwaad Anishinaabeg gaye igi godak gaa-izhi-dibendaagoziwaad omaa Kaanada akiing, ji-mino-ganawaabandiziwaad gaye ji-maamawi-wiijiwidiwaad ji-nisidotamowaad zoongakin inawenjigewinana gaye dazhiikewinan gaye izhitwaawinan nawach da-onji-zoongan Kaanada aki.

Ode'iminiigiizis 8, 2008



Kaanada Aki ninganootaan  
Gechi-ineninubd Stephen Harper  
Gichi-Ogimaa Kaanada Akiing

